



Majlis Ugama Islam Singapura

Khutbah Jumaat

10 Julai 2015 / 23 Ramadan 1436

Memakmurkan Akhir Ramadan

أَلْحَمْدُ لِلَّهِ الَّذِي أَنْزَلَ الْفُرْقَانَ وَ أَيْدِ النَّاسِ بِالْحِكْمَةِ وَ الْبَيَانَ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ شَهِدَ لِنَفْسِهِ
الْوَحْدَانِيَّةَ وَ الْإِحْسَانَ وَ شَهِدَ بِهِمَا مَلَائِكَتُهُ وَ الثَّقَلَانِ، وَأَشْهَدُ
أَنَّ سَيِّدَنَا مُحَمَّدًا عَبْدُهُ وَرَسُولُهُ الْمَبْعُوثُ بِالرَّحْمَةِ وَ الرِّضْوَانِ ،
اللَّهُمَّ صَلِّ عَلَى سَيِّدِنَا مُحَمَّدٍ وَ عَلَى آلِهِ وَصَحْبِهِ وَسَلِّمْ
تَسْلِيمًا كَثِيرًا. أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dimulikan

Hari ini merupakan Jumaat terakhir untuk bulan Ramadan tahun ini. Bagaimanakah ketakwaan kita saudara? Apakah kita sudah melihat peningkatan di dalam usaha kita melaksanakan segala perintah Allah dan menjauhi laranganNya? Masih lagi ada tersisa masa daripada Ramadan ini. Maka marilah kita terus mempertingkatkan ketakwaan kita. Mudah-mudahan kita meraih keampunan dan keredhaan Allah s.w.t.

Sidang Jumaat yang dirahmati Allah

Kita kini berada pada sepuluh malam terakhir di mana padanya terdapat malam agung iaitu Lailatul Qadar. Allah s.w.t. menjelaskan kelebihan malam ini di dalam surah Al-Qadr ayat 1 hingga 5:

إِنَّا أَنْزَلْنَاهُ فِي لَيْلَةِ الْقَدْرِ ﴿١﴾ وَمَا أَدْرَاكَ مَا لَيْلَةُ
الْقَدْرِ ﴿٢﴾ لَيْلَةُ الْقَدْرِ خَيْرٌ مِّنْ أَلْفِ شَهْرٍ ﴿٣﴾ تَنزِيلُ
الْمَلَائِكَةِ وَالرُّوحِ فِيهَا بِإِذْنِ رَبِّهِمْ مِّنْ كُلِّ أَمْرٍ ﴿٤﴾
سَلَامٌ هِيَ حَتَّىٰ مَطْلَعِ الْفَجْرِ ﴿٥﴾

Maksudnya: “Sesungguhnya Kami telah menurunkannya (Al-Quran) pada malam kemuliaan. Dan tahukah kamu apakah malam kemuliaan itu? Malam Kemuliaan lebih baik dari seribu bulan. Pada malam itu turun malaikat-malaikat dan Jibril dengan izin Tuhannya untuk mengatur segala urusan. Malam itu penuh dengan kesejahteraan sampai terbit fajar.”

Subhanallah! Bayangkan saudaraku, bagaimana hebatnya pahala dan ganjaran kurniaan Allah s.w.t. bagi mereka yang berjaya mendapat malam tersebut. Ternyata amalan pada malam tersebut lebih baik dari 1000 bulan, yakni sekitar 83 tahun. Kita ini saudara, belum pasti umur akan mencapai masa itu. Dosa dan noda kita juga mungkin menggunung tinggi. Oleh itu, janganlah kita lepaskan sebarang peluang untuk

mendapatkan pengampunan Allah s.w.t. dan rahmahNya. Nabi s.a.w pernah bersabda:

وَمَنْ قَامَ لَيْلَةَ الْقَدْرِ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ

Maksudnya: *“Siapa yang mendirikan solat pada malam Lailatul Qadar dalam keadaan beriman dan mengharapkan ganjaran, akan diampunkan dosanya yang telah lalu”* [Hadith riwayat Imam Al-Bukhari]

Cuma sahaja saudara, dalam kita ini mencari Lailatul Qadar perlu kita sedari bahawa pada hakikatnya kita ini mencari keredhaan Allah s.w.t. Kegigihan kita beribadah tidak seharusnya diniatkan semata-mata untuk meraih Lailatul Qadar. Tetapi kita perlu niatkan ia untuk meraih keredhaan Allah. Ini kerana Allah lah pemilik Lailatul Qadar dan segala-galanya. Maka apabila kita mencari keredhaan pemilik Lailatul Qadar iaitu Allah, Dia bakal memberi lebih daripada kelebihan malam tersebut. Mudah-mudahan dengan niat yang tidak terhad dan terbatas kepada sepuluh malam terakhir Ramadan, kita akan kekal gigih beribadah kepada Allah meskipun Ramadan telah berakhir.

Saudara,

Kita tidak tahu samada ini mungkin merupakan Ramadan yang terakhir kita di dunia ini. Kita tidak tahu samada kita mahupun keluarga akan dapat bersama melaksanakan ibadah puasa, terawih mahupun solat bersama pada Ramadan akan datang.

Oleh itu, sepertimana giatnya kita di dalam membuat persediaan untuk Aidilfitri, giatkanlah lagi keluarga kita untuk sama-sama meraih keistimewaan Lailatul Qadar dan Ramadan. Contohilah kebiasaan Saidina Nabi s.a.w., yang mana Baginda akan mengejutkan ahli keluarganya untuk turut sama beribadah dan mencari malam yang mulia ini. [Hadith Riwayat Imam Al-Bukhari dan Muslim]

Sidang Jumaat yang dirahmati Allah

Jadikanlah malam-malam Ramadan sebagai peluang untuk menghayati hubungan anda dengan Allah. Panjatkan doa dengan rasa tunduk kepada Allah memohon agar Allah mendekatkan diri kita kepadaNya dan meninggikan maqam kita dan keluarga disisiNya. Dalam sujud kita, insafilah segala dosa kita. Perbanyakkanlah membaca doa:

اللَّهُمَّ إِنَّكَ عَفُورٌ كَرِيمٌ تُحِبُّ الْعَفْوَ فَاعْفُ عَنَّا

Yang bermaksud: *“Ya Allah Sesungguhnya engkau adalah yang Maha Pemaaf dan sukakan kemaafan, maka ampunilah kami.”*

Mengadulah kelemahan kita kepada Allah dan pohonlah kekuatan daripadaNya. Inilah waktu-waktu yang penuh dengan pemakbulan doa. Serikanlah juga hari-hari terakhir ini dengan tilawah Al-Quran, basahkanlah lidah dengan alunan zikir dan semarakkanlah ia dengan sedekah untuk yang memerlukan khususnya keluarga kita. Sebagai contoh, pada hari ini,

terdapat di keseluruhan masjid-masjid Singapura tabung-tabung untuk mengumpulkan dana bagi persatuan Club HEAL. Tabung-tabung tersebut bertujuan untuk membantu saudara-saudara kita yang berhadapan dengan cabaran penyakit mental. Maka hулurkan bantuan, semoga melaluinya Allah s.w.t. memberkati usaha kita sepanjang Ramadan.

Saudaraku,

Di penghujung khutbah ini, marilah kita menghayati dan meneladani bagaimana Saidina Rasul s.a.w., yang walaupun maksum serta tidak membuat dosa, Rasul tetap meningkatkan usahanya di akhir-akhir Ramadan. Inikan pula kita. Oleh itu, sekiranya kita memiliki kelapangan masa untuk beriktikaf di sepuluh yang terakhir, maka hendaklah kita berusaha untuk melaksanakannya. Akan tetapi, bagi mereka yang memiliki kesibukan tugas seharian, ia tetap tidak menjadi penghalang buat dirinya. Pilihlah masa-masa yang sesuai untuk kita beriktikaf di rumah Allah. Samada dengan menunaikan solat zuhur di rumah Allah s.w.t. dengan niat untuk beriktikaf seketika. Ataupun kita menghidupkan malam-malam terakhir bulan Ramadan dengan mendirikan Qiyam dengan ahli keluarga kita di masjid-masjid.

Ya Allah, Tuhan pemilik Lailatul Qadar, kurniakanlah kepada kami sekeluarga ganjaran malam ini. Angkatlah darjat kami dan ahli keluarga kami di sisiMu.

Ya Rahim Ya Lathif, seandainya ini adalah Ramadan terakhir kami, maka janganlah kau keluarkan kami daripadanya kecuali setelah kau sucikan kami daripada segala noda dan dosa.

Sekiranya ditakdirkan Ramadan ini kali terakhir kami bersama keluarga kami, maka himpunkanlah kami di dalam syurgaMu nanti.

Ya Halim Ya Adhim, kekalkanlah di dalam diri kami kerinduan bertemuMu dan Ramadan. Jadikanlah kami golongan mereka yang istiqamah di atas kebaikan dan ibadah meskipun setelah Ramadan meninggalkan kami. Hidupkanlah hati-hati kami dengan keimanan sepertimana kami telah menghidupkan malam-malam Ramadan ini. Amin ya Rabbal 'Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.